

寶應縣志卷二十二

列女志

賢明

處士朱瓘繼妻張賦性柔靜歸瓘以不及事舅姑爲恨瓘卒遺孤訥誥皆幼氏孀居三十八年和輯內外慈而有禮嘗指訥泣曰未亡人忍死待汝者正以汝朱氏父祖皆業儒不幸蚤世古謂善人之報不于其躬于其後意者其在汝乎後訥官鄞縣氏就養至暮輒叩訥所治官事訥歷歷道之氏喜見於眉睫曰平易近民汝不聞此語耶訥用是益警懼君子以氏爲善教子

朱方中妻顧賢明有丈夫概翁曰藩宦遊姑茆與俱氏肩家政課耕之入以給賓祭及親知之窶乏者性簡默嚴重五子皆凜凜奉教四爲諸生一治農咸自樹立以故方中得逍遙湖上別業經旬累月不入城市閑適之致氏實成之方中卒氏疏食禮佛女適興化李氏甫嫁而孀撫之守節終

王言綽妻楊名生闌兵馬司副指揮九重女性莊重端謹讀書慕節義賊李自成陷京帝后死之氏日夜哭泣曰帝憂勤求治非亡國君國亡臣手可痛命子巖天佐天仁曰汝祖循吏汝父積學累行皆著道義名節汝等

讀書用世今流賊之亂如此天下事無可爲吾當與汝  
隱古耕養我終老祿養非我志也巖等跪而受教遯跡  
巖谷竟以迂闊自廢氏之教也言綽父思賢居官廉言  
綽不問生產家益貧楊以貲雄裝奩甚盛氏嫁衣盈笥  
悉出質賣以供言綽故言綽得一志於學生平好讀書  
手一編不釋燈火熒熒夜深乃寢見忠孝節烈慨歎追  
慕時爲家人稱之

知州潘叔暘妻仲字雲鸞按察使本女孫父承嘉教以  
讀書遂工詩著匪莪集叔暘山陽舉人任馬龍州知州  
仲封孺人年九十餘乃卒女適喬御史可聘封安人卽

侍讀萊母也讀書明大義亦工詩

處士喬出塵妻湯于歸三年不孕爲夫置妾曰余爲喬  
氏婦而嗣不繁何以慰姑嫜已而妾亦不孕孕又女也  
故處士數置妾氏均善視之後有許氏者生子演處士  
年已近五十矣及氏卒演年纔十一日夜泣不休處士  
孫枝蔚程邃聞之賦古風褒美久之出塵欲稍稍優禮  
許氏俾臧獲稱謂異昔時許不可泣曰如此是忘大母  
也比出塵年老演已游庠序有聲

廩貢生喬大鴻妾王山陽人喜讀書通曉大義大鴻天  
姿卓犖不遇於時然性豪逸不屑治生產氏日節其饋

爨之費以供緩急大鴻卒十口煢煢室無斗儲氏不欲生者屢矣既而悚然曰吾之子女誰子女耶其無徒死而守死可也乃以十指爲生活計中間更遭災祲死亡疾苦皆氏一身肩之而教子極嚴不令稍涉非僻嘗作訓子要言十二則道光間卒里黨奉爲女師

吉貞妻姚

割股救夫

成敬全妻喬

割股救夫

承德郎劉岡陵妻徐

撫孤成立

候選營千總季元發妻張

兩次割股救夫以上同治三年旌

薛某妻某

見同治揚州志

贈光祿寺典簿六合縣訓導劉廷器繼妻胡年二十六歸劉家非素封而廷器好施與氏佐夫理家政內外肅

然迨廷器卒有遺通氏減日用以歸之家益落兩子尙幼常撫而泣曰門祚之再造先澤之斬皆惟汝也篝燈課讀恆至中夜刀尺之餘檢家藏舊書手自裝訂而指示之凡冠服制度常守一法不隨時增減間不如旨輒慨嘆不怡必改乃已廷器始娶雷生源岱氏撫之如所生源岱歿遺孤九歲而殤氏哭之至嘔血族姪某貧將廢學氏資之復讀卒以有成咸豐初金陵陷淮南戒嚴里人相率去氏曰寇來未常據城守今據江甯而分寇揚郡此無北志也已而果然其料事明決類如此大學士彭文恭旌其廬曰畫荻流芳翁文端額曰松筠同操

學使孫如僅額曰節勵冰霜光緒五年旌

國學生刁崇儒妻鄒孝翁姑夫病刲股以進病果愈監生汪介石妻程甘泉人

應孝翁姑姑病刲股進病果愈粵賊陷揚州夫立志殉難程亦立志殉難人稱其賢張冠英妻張刲股進姑姑病果愈庠生周

彬文妻徐孝翁姑夫病刲股以進以上均光緒十四年旌

湯如璧妻成如璧家貧多病氏親侍湯藥衣不解帶者

累月如璧疾篤氏焚香籲天願減己壽益之刲股和藥

以進夫疾遂愈閱十年夫病又作氏焚香刲股復如前

迨夫卒喪葬悉如禮哀痛過甚二目失明年六十一卒

光緒十九年旌

王謙妻馬光緒二十三年旌

寶應縣志 卷二十一 賢明 四 列女志

韓澍槐妻吳夫家貧多病氏親侍湯藥扶持累月衣帶

未嘗解澍槐歿氏晝夜悲泣雙目失明茹素終身光緒二十四年旌

相文煥繼妻張撫長子珽與所生璪及有熊無畛域珽

亦感孝如所出文煥病革醫罔效子幼氏虔禱刲股和

藥文煥服之瘳延壽十年三子賴以成名光緒三十年旌

監生闕寶楠妻刁 問以洛妻姜刲股救夫庠生劉芙繼妻

刁光緒年間旌

封光祿大夫乾隆乙卯舉人國子監學錄朱彬妻劉乾

隆辛卯舉人世讜女幼端慤讀書知禮義年十九歸朱

奉重闈謹守家法衣飾儉樸寬仁忠厚喜施與御下有  
恩信浮屠法所書金剛諸經存於家年四十二卒  
湖北布政使朱士達妻葉福建巡撫世倬女幼端肅寡  
言笑少侍宦遊不侈不矜年二十一歸朱莊敬寬和事  
君舅先意承志士達服官安徽氏贊襄內政雖米鹽凌  
雜親蒞權衡量鼓與貧時無異氏母屢以巨金授氏皆  
不受或置田產歸之侍君舅疾廢寢食憂瘁致失血歿  
尤盡哀終以是卒年五十八

四川候補道朱念祖妻高循吏學濂女年十九歸朱淑  
慎怡和重闈鍾愛姑早卒而念祖經營四方氏以一身  
肩家事矢勤儉內政井然親族緩急視若己憂誨諸子  
皆成名年七十餘卒

從九品刁駕山妻袁事翁姑至孝家貧甚人丁繁衍氏  
操持家政悉承翁姑意備歷艱辛嘗私質簪珥補不足  
必使長幼甘旨無或缺而自甘淡泊家人咸感其賢

國史館漢謄錄官議叙通判李鼎銘妻朱秉性溫淑麤  
識文字遭母喪哀毀如成人年十七歸李時祖姑猶在  
堂氏念鼎銘由祖姑撫養成立今既不及事翁姑當并  
其力以事祖姑飲食則進其所嗜者夜寢則屏息靜聽  
安而後退勞心曲體久而不懈尤明大義夫與伯翁析

產氏以廉讓勗夫卒無所較家僅中資而振災卹貧無  
吝色戚黨有告貸者亦量以與之不責其償也

知府銜卽選同知附貢生王毓敏繼妻徐詹事府右春  
坊右贊善玉豐女相夫有道治家井井毓敏年五十邁  
危疾徐晨夕求神並與妾金共刺指血書金剛經焚之  
毓敏疾旋愈至七十乃卒徐喜吟咏暇輒藉以自娛歿  
後稿多散軼

封榮祿大夫知府用候選郎中朱百適妻劉副貢生鵠  
女幼敏慧讀書通大義事親至孝先意承志旣歸於朱  
事孀姑如事其親家素封百適尤好施與氏助夫擘畫

靡間初終凡受百適之惠者均稱道夫人之德平居粗  
衣糲食守儒素家風性尤和厚雖臧獲未嘗以聲色加  
之一甥三壻皆世家子氏助其膏火俾專精於學不爲  
境遷均得成名以子崧生官貴封一品夫人

四川補用同知朱綬生妻龔福建光澤人父振麟守台  
州殉盜匪難氏隨兄播遷兄之格權寶應縣篆綬生母  
高聞其賢遂聘焉于歸後事姑至孝姑疾劇同夫綬生  
封股以進姒女未彌月失恃氏乳哺若所生綬生孜孜  
爲善氏實贊助之戚黨歸譽焉

鮑履祥繼妻王高郵庠生兆蓮女曾封股以療父疾于

歸後復兩次割股療夫疾撫教前妻子女如己出鄉里稱之

湖北應山縣知縣王鴻卿妻劉嘗割臂肉以療父疾于歸後承親以順接娣姒以和鴻卿主豫省講席氏教子不稍姑息後皆能卓然自立

庠生吉鴻猷繼妻祁標德字四亭邑知名士斗南女幼承庭訓習禮明詩知醫藥于歸後事姑劉以孝聞嘗陳說古今逸事以博其歡偶值怒時則隨夫長跪必俟顏霽始起鴻猷歿內無期功親每見陵疏族氏多方以譬諭之莫不肅然遺孤幼弱氏殷勤顧復卒以有成著有

詩詞附鴻猷菁湖漁隱集中自寡居後遂絕筆不復作年六十八卒徐州府教授胡壬源妻孫邑武庠雍山女家素封于歸後值胡中落氏操持勤儉壬源捷萃科館穀所入家漸裕氏無子慨然於累世單傳爲置妾生子一女壬源膺某將軍聘氏親課之得通文義延師於家敬禮甚篤有附學者愛勉交至性好施與有求罔弗應丐食者踵其門親戚之孀嫠無依者恆食息其家略無德色

徐州府教授胡壬源妾鄧沛縣人家世業商以沛遭水冲流離至袁浦歸壬源佐正室孫操持家政無疾言遽

色待僕婢一主寬厚嘗僱一女傭遇之以恩三十年不求去孫好施與督子向學皆氏力成其志而加篤焉夫逝課子尤力謂胡氏書香不能不恃汝續也子由是博一衿其深明大義類如此

喬茗卿妻劉年二十一歸喬生二男一女茗卿歿翁姑俱在氏仰事俯育備歷艱辛待兩小姑極有恩持家崇尚節儉嘗勗子孫曰先人之遺產先人之心血在焉當謹守之無使敗爲子延名師於家塾無許濫交平時自處極有禮法雖炎暑裙襦未嘗去有勸其少報年歲以請旌者氏曰是欺君父也執不可壽至七十九卒兩孫

### 相繼遊庠

徐宗慶妻王

幽閒貞靜事翁姑如父母

國學生盧鏡溪妻梁天性敦厚七歲卽茹素父母病均刲股以進及于歸怡色柔聲得翁姑歡姑病刲股鏡溪病凡三次氏均刲股和藥飲之皆賴以痊晚年夫患目幾瞽氏日以舌舐之數月目復明一生勤儉菲薄自甘待人必厚戚族咸憐而敬之年五十四卒

監生季邦文妻梁幼精女紅性和順事親孝年十四母病篤刲股進母病以瘳二十一歸邦文事祖姑及翁姑均能得其歡心處娣姒輩和悅有禮祖姑病危氏虔誠



刲股祖姑病因以愈獲享高年邦文素患疝年近五十勢甚危殆氏日夜拜禱刲股和入藥中邦文亦得轉危爲安

監生徐玉堂妻陳父善承歿氏年數歲哀泣如成人母病噎弗瘳刲股以奉年十五歸徐事翁姑如父母翁與夫均多病家復貧氏侍疾外炊爨井白糜不親操年七十卒

楊佩鑫妻張光緒五年夫病篤氏刲股救治得愈越十載夫故氏年三十三歲子女俱幼家綦貧守志撫孤不辭勞瘁光緒三十一年卒

贈鑾儀衛經歷劉翔雲妻蔡國蘭字吟秋淮安徐州府教授覲雲女襁褓母周歿繼母芮撫之覲雲嘗遷怒責芮以身代受杖致嘔血泊事翁若繼姑如事父母姑性嚴每侍立至深夜不命之去不退遭譴呵順受無忤遇兩小姑尤厚敬事夫終身無違言家貧躬自操作輒先嫠嫂子二女一以勞鬱臥疾猶就榻課子讀不爲姑息愛幼慧六歲解誦唐詩女誠等篇頻歿焚所爲詩文辭曰女子尚德不尚才也年三十卒